

CARRASECARE

Ajò, comà, chi andamus a ballare
a sa tzitade cara a Don Bainzu;
est tantu tempus chi apo pistichinzu
de che torrare pro Carrasecare.

Bos ammentades? Como sun trint'annos,
che puddu e puddichina totu alluttos,
sos sonnos de sa vida non fin ruttos,
ne penas suffriamus ne ingannos.

Ah, cantu focu in corpus m'intendia
cando bos astringhia in bratzos forte,
tando pariat chi sa bona sorte
aeret favoridu a mie ebia !

E in sas carres bostras, a undadas,
currian prepotentes sos disizos
e sas laras de mele e sos lampizos
fin promissas de nottes alluscadas !

Carrasecare 'e ballos e de cantos
chi sos coros nos at ammaliadu!
Pustis sa vida nos at separadu,
ambos in chirca 'e atteros incantos.

Jeo attera rosa apo collidu
vois ateru frore ades sutzadu,
ma su coro in segretu at cuerradu
s'ammaju 'e cussu sonnu proibidu !

Sos annos sun bolados sentza pasu,
sas bramas isvanidas manu manu,
ma fintzas oe chi so pili canu
so ancora sididu 'e carchi asu.

Ah, punna macca... e maccu sonniare !
Però, ajò, 'estidebos a gala,
e a dispettu 'e calchi limba mala,
de nou nos tucamus a ballare !

E cras manzanu, finidu s'incantu,
istracos mortos de divertimentu,
chin d'unu 'asu lizeri che bentu,
nos dispedimus sentza rimpiantu.